

Roselprenuer bantu tingkat taraf hidup OKU

🕒 19 April 2024, 7:00am

38
Shares

f Share

X Tweet

Share

Email



KUALA NERUS: Sekumpulan ahli persatuan Orang Kurang Upaya (OKU) Pekak mampu menarik nafas lega selepas sekumpulan penyelidik Universiti Malaysia Terengganu (UMT) tampil membantu bagi menjana ekonomi mereka.

Ketua Projek, Prof. Madya Ts. Dr. Wan Zaliha Wan Sembok berkata pihaknya terpanggil untuk membantu kumpulan itu setelah menjalankan beberapa siri projek penyelidikan yang berpotensi untuk dilaksanakan oleh kumpulan sasar.



“Pada tahun 2020, OKU yang berdaftar di Jabatan Kebajikan Masyarakat adalah seramai 581,265 orang.

Daripada jumlah tersebut, OKU kategori cacat pendengaran mencatatkan 6.3%. Jumlah pekerja cacat pendengaran yang berdaftar dalam organisasi kerajaan atau swasta amatlah rendah, direkodkan hanya sekitar 210 orang OKU dengan masalah pendengaran.

“Oleh itu, satu inisiatif perlu diambil bagi membantu golongan ini dalam memajukan diri mereka melalui ilmu dan teknologi dalam bidang pertanian yang sangat luas dan mudah untuk diaplikasikan.

Menurutnya, penanaman rosul dan penghasilan produk berasaskan rosul merupakan ‘jalan keluar’ yang sesuai dan bertepatan dengan kelebihan yang dimiliki kumpulan itu.

“Kita perkenalkan projek tanaman rosul melalui program pemindahan ilmu serta mengadakan siri latihan melalui kelas dan juga amali di lapangan.

“Projek Rosulpreneur ini melibatkan hampir 100 orang ahli daripada komuniti OKU Pekak termasuk isi rumah dan sekiranya projek ini mencapai sasaran yang digariskan, kita sedia kembangkan kepada semua ahli OKU pekak yang berdaftar di negeri Terengganu.

“Kita terapkan semua aspek bermula dengan langkah pertama penyediaan tapak, semaian, penjagaan tanaman, tuaian dan juga penghasilan produk hiliran seperti jus, jem, aiskrim dan lain-lain.

Ujarnya, projek Rosulpreneur itu adalah di bawah tajaan dana Yayasan Inovasi Malaysia, Kementerian Sains, Teknologi dan Inovasi (MOSTI) dan dijangka memberi pulangan kira-kira RM1,000 sebulan.

“Projek ini diperkenalkan kepada ahli persatuan OKU pekak pada September 2023 dan pemilihan padanan peserta OKU ini juga berdasarkan kemampuan serta mudah dilaksanakan dengan kos rendah.

Katanya, program berbentuk pemindahan ilmu kepada komuniti itu telah dilaksanakan sejak lebih lima tahun lalu melibatkan peserta dari pelbagai latar belakang seperti komuniti asnaf, ibu tunggal dan kumpulan B40.

“Beberapa program pemindahan ilmu telah dilaksanakan sebelum ini seperti projek penghasilan baja, projek penanaman Melon Manis Terengganu, projek penanaman sayuran berbuah seperti tomato ceri, bendi, cili, timun batang serta penanaman pelbagai jenis sawi termasuk strawberi tanah rendah. Selain itu, OKU Pekak ini juga telah mampu berdikari melalui projek pertanian bandar atau Kebuniti Madani yang mana telah membuahkan hasil lumayan.

“Apa yang kita harapkan semoga program pemindahan ilmu dari universiti kepada komuniti seperti ini mampu memberi suntikan semangat dan harapan baharu buat kumpulan sasar untuk keluar daripada kepompong kemiskinan serta mengubah kualiti kehidupan ke tahap lebih baik,” katanya.